

Бақара сураси, 146-оят

16:00 / 13.12.2017 3039

Биз китоб берганлар уни (Мұхаммадни) болаларини таниғандек танирлар. Ва албатта, уларнинг бири гуруҳи билиб туриб, ҳақни беркитарлар. Бақара 146.

Инсон ўз боласини ҳаммадан яхши танийди. Чунки бола унинг жигарбанди, унда ўзининг қони, ҳис-туйғулари ва бутун вужуди аксини топған. Баъзи ҳолларда боланинг ўзи у ёқда турсин, ҳидидан ҳам танийди. Шунга қиёсан, зарбулмасал қилиб айтиляптики,

«Биз китоб берганлар уни худди болаларини таниғандек танирлар».

Чунки уларнинг муқаддас китоблари – Таврот ва Инжилда охирзамон Пайғамбари ҳақида очиқ-ойдин хабарлар келған. Яҳудийлардан инсофлилари ўша хабар асосида Набий алайҳиссаломга иймон келтириб, саҳобалик баҳтига мұяссар бўлғанлар.

Ўшалардан бири Абдуллоҳ ибн Салом розияллоҳу анҳу:

- Мен уни ўғлимдан ҳам яхши танийман, – деганлар. Ҳазрати Умар розияллоҳу анҳу:
- Нима учун? – деб сўраганларида:
- Мұхаммаднинг пайғамбар эканига менинг ҳеч шубҳам йўқ, аммо ўғлимнинг онаси хиёнат қилған бўлиши мумкин, – деганлар. Шунда ҳазрати Умар у кишининг бошларидан ўпганлар.

«Ва албатта, улардан бир гуруҳлари билиб туриб, ҳақни беркитарлар».

Лекин аҳли китоблардан бир гуруҳлари ҳақни билиб турсалар-да, ҳасад қилиб, беркитадилар. Шу жумладан, Мұхаммад алайҳиссаломнинг ҳақ пайғамбар эканликлари ва қибла ҳақидаги илмни ҳам. Улардаги мавжуд ҳасад доимо ўзини кўрсатиб туради.